

增修
補註
正續歷代通鑑輯覽

增

聖祖仁皇帝

〔壬午〕康熙四十一年春正月詔修國子監

庚戌帝幸五臺山

二月庚申駐蹕射虎川丁丑巡視子牙河

嵩祝等調湖廣兵分布要隘先遣人招撫獠人獠人懼而降連州平 嵩祝等師次連州遂檄三省官兵分布要隘繪圖以進尋疏言臣等遵奉皇上指示機宜勘視八排山寨卽于要地設立營壘先遣人招撫連州界內油嶺衡祥橫坑三排獠人先行薙髮開報家口荷負雞醢酒食呈送行營而連州附近之軍寮馬箭火燒坪大掌嶺四大排並雞公背等各小排以次投誠最後黎巴洞排獠人將爲首殺害官兵之李貴等九人擒獻卽行正法遣兵察驗人口共八千一百餘安插事宜責成提督料理臣等撤兵回京得旨嘉獎

三月壬午帝還京師

夏六月貴州葛彝寨苗人爲亂官兵討平之

御製訓飭士子文頒發禮部命勒石太學

己未帝奉皇太后避暑塞外

閏六月四川巡撫貝和諾奏打箭鑪

今四川康定縣

木鴉一帶應添設安撫使以專

管轄從之以該處有歸順番民一萬九千戶故也

秋七月庚戌帝駐蹕熱河

命徐州至清口停築石隄

諭曰朕巡寧夏時于黃河舟行二十餘日觀其

水勢毫無定所今舊河故道俱被漫溢若一遷流難復故處築隄防之偪其水性易致衝決甚無謂也可停築石隄

八月戊申帝還京師

九月諭治黃河仿治永定河法

諭曰朕觀永定河修築之法甚善河身直

河底深所以淤沙盡皆衝刷今治黃河亦用此法方爲有益今張鵬翮所奏開挑引河建築草壩著卽照行此工多費不過十萬兩試仿永定河法修治之

以席哈納爲文淵閣大學士

癸酉帝巡視南河

冬十月帝以皇太子允初患病駐蹕德州癸卯還京師

制錢改鑄大式停止鼓鑄小錢 帝諭九卿等曰私鑄之弊朕知之甚悉欲禁止何難但必洞澈錢法利弊始可行之爾等須加詳議務使永遠遵行無弊可也尋議鑄錢每文重一錢四分停止舊式小錢鼓鑄三年內許大小互用大錢足用則小錢可漸銷毀從之

石琳以年老乞休允之調郭世隆爲兩廣總督以金世榮爲閩浙總督

十一月諭將雲南貴州四川廣西四省四十三年錢糧悉行蠲免 諭大學

士等蠲賦爲愛民要務徵收錢糧原爲國用不足國用若足多取奚爲比年以來附近省分俱行寬免惟雲南貴州四川廣西等處未得常邀蠲恤今戶部庫帑有四千五百萬兩每年並無糜費朕欲將此四省四十三年錢糧悉行蠲免儻更寬裕並及廣東省亦令蠲免其蠲免四省諭旨明春卽行曉示

〔癸未〕四十二年春正月帝巡視南河庚午過濟南府壬申駐蹕泰安州登泰山

二月丁丑由宿遷縣渡黃河徧閱徐家灣等隄至烟墩登岸己卯自桃源縣登舟徧視河隄入清江口泊天妃閘壬午駐蹕揚州府城內甲申渡江登金山江天寺丙戌駐蘇州府戊子登舟庚寅駐杭州府癸巳回鑾辛丑至江寧三月戊申閱高家堰翟家壩等隄工庚申還京師夏四月以陳廷敬爲文淵閣大學士兼吏部尙書命李光地爲吏部尙書仍管直隸巡撫事以喻成龍爲湖廣總督

五月帝巡幸塞外

秋七月帝還京師自東直門入臨和碩裕親王福全喪哭之慟

裕親王帝兄也

八月諭將山東全省官員停其升轉諭吏部山東一省官員平日不知重積蓄備荒災所以一遇凶年束手無策致勞京師遣官賑濟今應將山東合省官員停其升轉俟民生復甦之日再行開復

九月湖南紅苗叛巡撫趙申喬

字慎庵武進人

等討平之湖南鎮筸紅苗作亂巡

撫趙申喬合黔楚粵兵進勦貴州提督李芳遠深入苗地平糯糖山葫蘆天星諸寨尙書席爾達副都統圖思海徐九如率荊州兵至自龍椒洞至

天星寨分路搜剿斬馘千餘降其寨三百餘移辰沅道駐鎮其地
冬十月癸未帝西巡癸巳駐蹕柏井驛丁酉至太原

十一月乙巳次洪洞壬子渡河次潼關丙辰至西安閱武設宴癸亥回鑾
十二月庚辰駐蹕磁州庚寅還京師

〔甲申〕四十三年春正月以西安將軍博齊兼管川陝總督事

三月以劉殿衡爲湖廣巡撫

帝幸南苑行圍

夏四月命侍衛拉錫等探視河源

六月帝巡幸塞外

秋七月遣員分往直隸河南山東探問雨水多寡禾苗情形諭大學士等

近觀塞外雨水調和百穀暢茂爾等可簡善馳賢能中書分遣直隸河南
山東各一員問明雨水多寡禾苗情形來奏其差往直隸巡撫處者並探
永定子牙二河水勢

九月癸亥帝還京師

侍衛拉錫等探河源還繪圖奏聞

拉錫等歸奏云臣等於四月初四日自京起程五月十三日至青海十四日至呼呼布拉克貝勒色卜騰扎爾

同臣等起程前行，六月初七日，至星宿海之東，有澤名鄂陵，周圍一百餘里，初八日至鄂陵西，又有澤名扎陵，周圍三百餘里，鄂陵之西，扎陵之東，相隔三十里，初九日至星宿海，蒙古名鄂敦搭

拉，登山之至高者，視之，星宿海之源，小泉萬億，不可勝數，周圍羣山，蒙古名庫爾滾，即皇崙也，南有山名古爾班吐爾哈，西南有山名布胡珠爾黑，西有山名巴爾布哈，北有山名阿克塔，因七

奇，東北有山名烏蘭杜石，古爾班吐爾哈山下諸泉，名為噶爾馬沁尼，三山之泉，流出三支，河，即古爾名，為噶爾馬春穆朗，阿克塔，因七奇，山下諸泉，名為噶爾馬沁尼，三山之泉，流出三支，河，即古爾

班索羅謨也，三河東流入札陵澤，自札陵澤，一支流入鄂陵澤，自鄂陵澤，流出，乃黃河也，此外為小河者，不可勝數，盡歸黃河，東下，臣等自星宿海，于六月十一日回程，向東南行，二日，登哈爾吉

山，見黃河東流，至呼託羅海山，又南流，繞撒拉克山之南，又北流，至巴爾託羅海山之南，次日，至冰山，山之西，其山最高，雲霧蔽之，蒙古言此山長三百餘里，有九高峰，自古及今，未見冰消，常雨

雪，一月，中三四日晴而已，自此南行十六日，至席拉庫特爾之地，又向南行，過僧庫里高嶺，行百餘里，至黃河岸，見黃河自巴爾託羅山向東北流，于歸德堡之北，達喀山之南，從兩山峽中流入

蘭州，自京至星宿海，共七千六百餘里，寧夏之西，有松山，至星宿海，天氣漸低，地勢漸高，人氣閉塞，故多喘息，謹繪圖呈覽，報聞，鄂陵海，在葉克錫理西，扎陵海，在博墨圖庫特爾西，哈爾吉山，

在托灰哈達噶西

冬十月調李振裕為禮部尚書，以徐潮字青來，浙江錢塘人為戶部尚書

以趙宏燮甘肅寧夏人為河南巡撫

帝閱永定河

停築薛家莊等處減水壩，帝臨閱齊蘇助所勘薛家莊擬築減水壩之處

諭大學士等，此處迎溜頂衝，若築減水石壩，遇水漲時，石壩雖不妨，而兩

邊土壩可虞，見在河勢南岸露出磯背，北邊暗被衝刷，今已近北岸矣，朕

向巡幸西塞之外，見黃河一邊出磯背，則一邊必然衝刷，水性原如此，朕

故知之此處斷不可築減水壩也因問之土民皆云三十年前河流原近南岸衆皆驚服

十二月准湖廣各府州縣熟苗中有通文義者與漢民一體應試以河工告成加河道總督張鵬翮太子太保餘加級給獎有差

〔乙酉〕四十四年春正月以常舒爲理藩院尙書

二月癸酉帝南巡啓鑾

命募民墾湖北荒地無力者官給牛種

帝泊舟濟寧浙江巡撫張泰交以浙民望幸奏帝允其請

三月壬寅渡黃河閱楊家莊隄閘乙巳駐蹕揚州辛亥駐蘇州己未駐松江

夏四月丙寅駐杭州癸酉回鑾乙酉駐江寧閱射

閏四月癸卯帝至高家堰徧閱河隄丙午閱視黃河九里岡甲寅泊舟故城

縣乙卯過景州辛酉還京師

六月丙辰帝駐蹕熱河

以李光地爲文淵閣大學士李光地劾雲南布政司張霖假稱奉旨販賣私鹽得銀百六十餘萬兩得旨卽令李光地審擬霖論斬家產籍沒入官

帝諭吏部曰李光地居官甚好才品俱優授尙書年久着陞爲文淵閣大學士調河南巡撫趙宏燮爲直隸巡撫

秋七月以古溝唐埂清水溝韓家莊四處隄岸潰決革河道總督張鵬翮職仍留任

八月以石文晟爲湖廣總督

九月丙子帝還京師

冬十一月命丹濟拉等探聽策妄阿喇布坦信息授散秩大臣丹濟拉爲扎薩克輔國公往推河策零旺布所居地駐紮同內閣侍讀學士殷扎納探聽策妄阿喇布坦信息如有舉動調附近喀爾喀兵馬防禦之

命查明康熙元年以來蠲免錢糧總數目大學士等以蠲免湖廣錢糧上諭進呈帝問曰曾查此數年蠲免錢糧數目否馬齊等奏曰自康熙四十二年以來蠲免一千六百餘萬帝曰自吳三桂變亂之後民甚艱苦故朕累年蠲免錢糧民生優裕則國家太平矣爾等可查康熙元年以來所免錢糧總數來奏尋奏查自元年以來所免錢糧共九千萬有奇報聞

〔丙戌〕四十五年春二月癸巳帝巡幸畿甸丁未次靜海縣閱子牙河隄戊

午還宮

兩江總督阿山疏劾江寧府知府陳鵬年貪酷帝命漕運總督伊桑額河道總督張鵬翮審擬鵬年論斬特旨令來京在修書處效力先是阿山以帝將復南巡召屬官議加賦鵬年力言不可阿山銜之故有是劾賴帝素知其人得免未幾復授蘇州府知府

三月命直隸各省建立育嬰堂從左都御史周清原請也

夏五月以金世榮爲兵部尙書

以梁鼎爲閩浙總督

六月停止陝甘舊用永豐倉升斗川陝總督博濟疏言去歲奉旨念民間所用升斗大小不同令部臣較鑄平準頒行臣已照式鑄造轉發各屬但陝甘收糧舊用永豐倉斗駐防兵糧亦以此支放相沿已久今以部頒新斗較量一石計短少三斗如以新斗收受卽以新斗放給則十分之中已減三分兵馬糧料不無艱窘況陝甘兵馬較他省最多倘有行走全賴士飽馬騰查收受民糧時尙有多收耗糧一項請將此項耗糧永行禁革百姓交糧令照舊斗之數以新斗交收支給兵糧亦照舊斗之數以新斗量

給則耗糧革絕民已樂輸而陝甘滿漢十餘萬兵丁俱仰沐格外之恩矣
下部議如所請其永豐倉升斗永行禁止

秋九月雲貴總督貝和諾疏報擒獲逆匪李天極王枝葉等于富民縣之響
哨山李天極者昆明人冒入廣通縣學與臨安府生員朱六非造爲符籤
以師宗州生員之子魏枝葉流蕩不歸誘之詭託明桂王之孫陽以王姓
相呼遇開化府賣藥人楊春榮蒙自縣談相人張平山富民縣演伎人楊
起鳳同謀不軌僞稱文興三年以鉛摹桂王之寶及諸僞印散播總制大
將軍副總兵都督僉事等僞劄願入黨者改裝蓬頭僧或長髮道人潛期
先掠廣南次掠開化由蒙自刼省城嗣爲督標弁兵首報先後擒獲李天
極王枝葉楊春榮楊起鳳張平山朱六非請旨立斬餘黨流徙數人首報
者獎賞如例

冬十月吏部尙書敦拜以老乞休許之以工部尙書溫達調補以希福納爲
工部尙書

十二月拉藏起解假達賴喇嘛赴京先是達賴喇嘛身故第巴匿其事搆
使厄魯特喀爾喀互相仇殺擾害生靈又立假達賴喇嘛以惑衆人且曾

毒拉藏因其未死後復逐之是以拉藏蓄憾興兵執第巴而殺之陳奏假達賴喇嘛情由帝命護軍統領席柱學士舒蘭爲使往封拉藏爲翼法恭順汗令拘假達賴喇嘛赴京拉藏恐衆喇嘛必至離散不從席柱等奏聞帝諭諸大臣曰拉藏今雖不從後必自執之來獻至是拉藏果起解假達賴喇嘛赴京

兩廣總督郭世隆疏報海洋巨盜蔡曾等聚衆刦掠商船今已擒獲傳旨立斬

詔刑部罪囚緩決至三四年者減死一等直省亦如之

〔丁亥〕四十六年春正月帝南巡閱河

二月壬寅次清河閱武家墩癸卯閱視溜淮套由清口登陸詳看地方形勢駐蹕曹家廟

河道總督張鵬翮以議開溜淮套輕舉妄動革宮保銜從寬留任

帝自曹家廟還清口命將沿途所立開河標竿盡行撤去諭曰朕觀此地

百姓可謂淳樸彼見豎立標竿墳墓之上毫無怨色及聞朕諭溜淮套停止開河羣情歡悅不勝鼓舞感激可見伊等惟知尊上絕無他意可謂良

民矣。是日江南百姓請臨幸江南許之。

三月己未帝駐江寧己巳駐蘇州丙子駐松江。

夏四月甲申駐杭州。

五月癸酉帝還京師。

六月丁亥帝巡幸塞外。

秋七月駐蹕熱河丁卯發喀喇和屯巡幸諸蒙古地方沿途諸藩來朝各賜

衣幣。

八月討平苗人黃柱漢等。雲南貴州總督貝和諾奏貴州普安州

今爲縣屬貴西道

三江苗人黃柱漢等在菴章寨肆行劫掠遣官兵討平之。

九月帝還京師。

冬十月以蕭永藻爲兵部尙書。

命截留漕糧賑濟杭嘉等處。時杭州嘉興等處雨少無收浙撫王然疏言

奉命賑濟查常平倉積粟無多請照山東例于常平倉開例捐納帝諭大學士等曰浙江被災州縣亦照江南着總漕桑額會同該撫截留漕糧賑

濟何必捐納

十二月以溫達爲文華殿大學士

〔戊子〕四十七年春二月甲午帝巡幸畿甸

命暹羅使臣所帶貨物聽其隨便貿易並免徵稅

三月丙辰帝還京師

夏四月調徐潮爲吏部尙書

以齊世武爲川陝總督

內大臣明珠卒

五月丙戌帝巡幸塞外

六月丁未駐蹕熱河

殺前明宗室朱三父子並其黨先是浙江巡撫王然奏擒獲大嵐山賊賊

首張念一供出朱三太子及其子等遣侍郎穆丹往審並命作速追拏賊

首所供朱三太子及其子等旋山東巡撫趙世顯拏獲朱三父子解往浙

江交穆丹處

朱三者乃明代宗室時年七十六歲父子嘗遊行讀書寄食人家

至是諭將朱三及其黨並立斬妻

子發往寧古塔

秋九月乙亥駐蹕布爾哈蘇臺

皇太子允禔忽染狂疾下詔廢之。帝召諸王大臣侍衛文武官官員等齊集行宮前命皇太子允禔跪垂涕諭其不法祖德不遵誨諭惟肆惡虐衆暴戾淫亂諭畢痛哭仆地諸大臣扶起旋諭將允禔卽行拘執并親撰告祭天地太廟社稷文廢斥之幽禁咸安宮。

己丑帝還京師。

諭將皇八子允禩鎖拏交議政處審理。允禔旣廢允禩大有奪嫡之意宣言相面人張明德曾相允禩後必大貴帝怒曰允禩柔奸性成妄蓄大志朕素所深知其黨羽早相要結謀害允禔今其事皆已敗露著將允禩鎖拏交與議政處審理。

冬十月以張鵬翮爲刑部尙書。

十一月革允禔王爵幽禁之。以大阿哥

直郡王

允禔令蒙古喇嘛巴漢格隆

咒詛廢皇太子用術鎮壓革去王爵卽幽禁于其府內凡上三旗所分佐領盡撤回給與允禔。

予故致仕文華殿大學士張英祭葬諡文端。

以廢皇太子病由魘魅至是治療已痊諭衆釋之。

復封允禩爲多羅貝勒

十二月以黃秉中爲浙江巡撫

〔己丑〕四十八年正月諭將大學士馬齊交允禩嚴行管束 帝召領侍衛內大臣滿漢大學士尙書等問曰去年朕躬違和令爾等于諸阿哥中保奏可爲儲貳者爾等何以獨保允禩允禩獲罪于朕身撓縲紲且其母家微賤豈可使爲皇太子況允禩乃允禔之黨允禔曾奏言若立允禩爲皇太子伊當輔之可見伊等結黨潛謀早定于平日矣其日先舉允禩者爲誰爾等各據實陳奏時內大臣巴渾岱奏衆人公同入奏並無首先發言之人帝曰爾等所舉皆同則大可疑矣此必有倡首之人旋查出議政大學士馬齊帝曰馬齊向來謬亂如此大事尙懷私意豈非欲結恩于允禩爲日後恣肆專行計耶尋康親王椿泰等遵旨審鞫擬馬齊立斬帝不忍卽誅卽交允禩嚴行管束

二月己酉帝巡幸畿甸戊辰還京師

三月庚辰以復立皇太子允禔遣官告祭天地宗廟社稷

夏四月以穆和倫爲禮部尙書

顯親王衍潢等遵旨會議喇嘛巴漢格隆等呪魘皇太子情實應凌遲處死
得旨依議

丁卯帝巡幸塞外

五月甲戌駐蹕熱河

秋七月以齊世武爲刑部尙書殷泰爲川陝總督

以噶禮爲兩江總督

九月丙子帝駐蹕博洛河屯賜來朝外藩銀幣

以年羹堯

號雙峯
廣寧人

爲四川巡撫

庚寅帝還京師

冬十月諭福建廣東兩省不拘舉人進士生員監生兵民內深諳水性熟習
水師營務之人有願附巡哨船艦出洋效力擒斬盜賊建立功名者著該督
撫查明保奏

冊封皇三子允祉爲和碩誠親王皇四子允禩爲和碩雍親王皇五子允祺
爲和碩恆親王皇七子允祐爲多羅淳郡王皇十子允祜爲多羅敦郡王皇
九子允禧皇十二子允禔皇十四子允禵俱爲固山貝子